



Meeqqat pisinnaatitaaffii pingaarnertut tunngavigalugit nuna tamakkerlugu imigassaq pillugu politikimik Kalaallit ineriartortitsisoqartariaqannginnersoq kiisalu inuit ataasiakkaat kiffaanngissuseqarnerisa aammalu meeqqanik illersuinissap akornanni oqimaaqatigiissitsilluni tamanna qanoq aqqqissuunneqartariaqarnerisooq pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Nivi Rosing, Inuit Ataqatigiit)

Inatsisartunut ilaasortap Nivi Rosingip siunnersuutaanut qujanaq.

Imigassaq pillugu politikki pigaangatsigu malittarisassat, akitsuutit, pissarsiarineqarsinnaaneraluunniit kisiisa oqallisigineq ajorpagut. Inuit, ilaqutariit, meeqqat, toqqissisimanerlu oqallisigisarpagut.

Imigassaq inuppassuit inuunermi nalinginnaasumik atugaraat. Amerlanersaannut ajoqutaanngilaq. Tamanna akuersaaratsigu ersarisassallugu Demokraatinut pingaaruteqarpoq. Nunatsinni innuttaasut amerlanersaat ajornartorsiutaanngitsumik, akisussaassuseqartumillu imigassamik atuisuupput. Suliffitik paaraat, ilaqqutatik isumagaat, inuulluataarlutillu. Inuit taakkua pisariaqanngitsumik killilersuutinik eqqussanngilagut imaluunniit tatiginninnginnermik oqallisigissanngilagut.

Ajornartorsiutinut artornartunut inuiaqatigiinnut siullertut inerteqquteqarnissaq, aqutsinissarluk kissaatiginngilarput. Kiffaanngissuseqarneq upperaaput. Akisussaassuseqarneq upperaaput. Inersimasullu aallaavittut namminneq aalajangiisinnaassuseqartut upperaaput. Kisiannili ilutigisaanik piviusooq takusariaqarparput.

Allarluinnarmimmi aamma piviusooqarpoq. Tassalu imigassaq inuttut qinigassaaginnarani, kisiannili meeqqanut toqqissisimannginnermik, sumiginnaanermik, ajornerpaamillu pisoqartillugu inuunermi ikiliinermik nassataqartoq. Meeqqat amerlavallaat angerlarsimaffimmi imigassartorfiuvallaartumi peroriartorput. Angerlarsimaffik toqqissisimaffissaagaluq qanoq pisoqarnissaanik nalorniffiusooq. Paaqqutarinninnissaagaluq sumiginnaanerusooq. Meeraanerlu meeqqamit kimilluunniit misigineqartariaqanngikkaluortoq sunnertisimaneqarluni. Tamanna akuerisinnaanngilarput.

Meeqqat salliuunneqartuaannarnissaat uagutsinnut Demokraatinut tunngaviulluinnarpoq. Meeqqap toqqissisimanissaminik, paaqqutarineqarnissaminik, allanngujaatsumillu peroriartornissaminik pisinnaatitaaffeqarnera inersimasut atuinerinit imaluunniit ileqquliussimasamiit kingulliunneqartassanngilaq. Meeqqat atugarissaarnissaannut imagassaq akornutaanngisaannassaaq. Naamerluinnaq.

Kisianni inerteqquteqarnerit amerligutsigit tamanna ajornartorsiummut immi iluarsissutaassasoq



DEMOKRAATIT

eqqarsarnaveersaassaagut. Imaanngilarmi amerligutsigit ajornartorsiummut iluarsiiisutaassasoq. Siammasippallaamik eqquigutta meeqqat pisariaqartitsinerpaasut ikiornagit akertiunermik, tatiginninnginnermillu pilersitseratarsinnaavugut.

Isumaqarpugut oqimaaqatigiissitsineq aalajangiisuulluinnartoq. Imigassaq pillugu politikkip pitsaasup ataasiakkaat kiffaanngissuseqarnerat ataqqissavaa, ilutigisaanillu ikiortariaqarnerpaat illersorlugit. Taamaattoqassappat eqqarsarluartariaqarpugut, assigiinngissutsit ataqqisariaqarpagut, aqqiissutissallu pisariinnerusut toqqassanngilagut.

Meeqqat angerlarsimaffimmi atornerluiffiusumiippata siusinnerusukkut akuliunnissatsinnut pikkorinnerungaatsiartariaqarpugut. Ilaqutariit ikiorneqarsinnaanissaat, ikiorneqarnerisalu siunnerfeqarnissaat, piviusumillu atorsinnaanissaa qulakkiissavarput. Pinngitsuuisinnaanermik ilungersuuteqartunut katsorsaannermi periarfissat nukittorsassavagut, ikiuniarnerullu akuerineqarnissaanik piumasaaqateqasinnaasariaqarluta.

Inuiaqatigiittut ersarinnerussaagut. Imigassaq sumiginnaanermik, angerlarsimaffimmilu nakuusernermik imaluunniit toqqissisimanninnermik kinguneqarpat, tamanna ataasiakkaanuinaq tunngassuteqanngilaq. Ataatsimut akisussaaffinngortarpoq.

Demokraatit maluginiarpaat ilisimatusarnikkut paasisat, ilisimasallu tunngavigalugit imigassaq pillugu nutaamik politikkip Naalakkersuisut suliaqarlutik aallartereersut. Tamanna isumalluarnarpoq, suliarlu taanna pitsaasumik siunertaqarnermik tunngaveqaannarani, suut iluaqutaanerinek ilisimasanik tunngaveqarnissaa pingaaruteqarluni.

Politikkissap siunnerfeqarnissaa uagutsinnut aalajangiisuuvoq. Pisariaqarfiunerpaami iluaqutaanissaa, allaffissornermit ipitinneqannginnissaa, ajornartorsiutillu aalajangersimasut aaqqiiffiginagit siammasissumik eqquilluni nalinginnasaasumik sukaterinngunnginnissaa. Meeqqanut ilumut allannguisumik politikkeqassaagut.

Inaarutaasumik ukua oqaatigerusuppakka: Kiffaanngissutsip, akisussaaffiullu akornanni toqqaanissamut manna tunngassuteqanngilaq. Marluutillugit anguniarnissaannut tunngavoq. Ataasiakkaanut kiffaanngissuseqarneq, immitsinnullu akisussaaffeqarneq. Siullertullu meeqqanut namminneq oqaaseqarsinnaanngitsunut akisussaaffeqarneq.

Taakkuupput oqallinnissamut, peqataaffigissallugu qilanaarisatsinnut maannamut Demokraatinit isummersuutigerusutagut.